

Hanya 30 pesilat muncul untuk latihan

29 FEB 1988

Beberapa perguruan tidak tepati janji

3

Oleh HANIM MOHD SALEH

HANYA 30 daripada 400 pesilat yang diperlukan untuk persembahan beramai-ramai bagi Pertunjukan Perpaduan Seni Pertahanan Diri dan Qigong Nasional pada 27 Mac ini hadir pada hari latihan pertamanya kelmarin. *Rujukan*

Latihan yang berlangsung di Rumah Silat, Kallang, seharusnya dihadiri oleh sekurang-kurangnya lapan perguruan yang berdaftar dengan Persekutuan Silat Singapura (Persisi) tetapi hanya Perguruan Alhak saja yang muncul.

Menurut Setiausaha II Persisi, Encik Mohd Kamin Mohd Said, beliau telah menghubungi beberapa perguruan silat tentang latihan tersebut dan antaranya telah berjanji akan menghantar pesilat mereka.

Semasa dihubungi, beberapa perguruan mengatakan mereka tidak tahu tentang latihan itu.

Ada pula yang melahirkan rasa tidak puas hati mereka tentang pucuk pimpinan Persisi yang baru dibentuk dalam mesyuarat agungnya 17 Februari

lalu sebagai alasan mengapa mereka tidak hadir.

Ketika dihubungi, seorang guru perguruan Sendeng Belalang, Encik Mohd Nah Jaeh, berkata beliau tidak tahu menahu tentang latihan itu. Namun begitu, katanya, kalau pun diberitahu, beliau tidak mungkin menghantar pesilatnya.

Katanya: "Saya kurang senang dengan pucuk pimpinan yang ada sekarang. Orang yang lama tidak aktif dalam Persisi, tiba-tiba diberi jawatan yang penting, sedangkan mereka yang telah banyak berjasa dengan Persisi dikesampingkan."

Majlis Guru-Guru (MGG) Persisi — sebuah majlis yang dianggotai oleh guru-guru silat atau pelatih kanan yang membantu menyelaras dan membukukan sukatan pelajaran silat — yang dibubarkan sejak mesyuarat lalu, juga dikatakan menjadi punca sebahagian perguruan tidak hadir.

Ketua Umum perguruan Panca Sakti, Encik Abdul Shukur Rais memberitahu:

"Sejak mesyuarat yang lalu, MGG baru belum dibentuk. Ja-

di, walaupun saya diberitahu tentang latihan itu, saya tidak dapat menjalankan tugas kerana belum diberi mandat atau arahan rasmi."

Panca Sakti akan menghantar 30 orang pesilat untuk persembahan itu sebaik saja MGG dibentuk semula, ujarnya.

Sementara itu, ketika dihubungi, Encik Mohd Kaspari, Setiausaha I Persisi, berpendapat anggota jawatankuasa Persisi yang lama seharusnya terus bekerjasama walaupun tidak lagi memegang jawatan.

Katanya: "Untuk meneruskan perjuangan Persisi, kita tidak mampu menyimpan perasaan tak puas hati. Setiap anggota mempunyai kedudukan, peranan dan tanggungjawab yang tersendiri."

Pertunjukan di Stadium Toa Payoh itu akan memperlihatkan kehandalan para peserta dari pelbagai kumpulan seni pertahanan diri di Singapura dan persembahan Singa Chuan (seni bela diri Singapura) yang dijangka disertai oleh lebih daripada 1,000 orang.